

CONVENIO DE COLABORACIÓN ENTRE A CONSELLERÍA DE POLÍTICA SOCIAL E IGUALDADE E A ASOCIACIÓN REDE EUROPEA DE LOITA CONTRA A POBREZA E A EXCLUSIÓN SOCIAL NO ESTADO ESPAÑOL DA COMUNIDADE AUTÓNOMA DE GALICIA (EAPN GALICIA) PARA O DESENVOLVEMENTO DE ACTUACIÓNS ENCAMIÑADAS Á COORDINACIÓN, OPTIMIZACIÓN DOS RECURSOS E SINERXIAS DE ACTUACIÓN DAS ENTIDADES INTEGRANTES QUE TEÑEN COMO FINALIDADE A LOITA CONTRA A POBREZA E A EXCLUSIÓN SOCIAL NO EXERCICIO 2025.

REUNIDOS

Dunha parte:

Dona Fabiola García Martínez, conselleira de Política Social e Igualdade da Xunta de Galicia, nomeada polo Decreto 44/2024, do 14 de abril, actuando en nome e representación da Consellería de Política Social e Igualdade, no uso das facultades que lle veñen atribuídas no artigo 34 da Lei 1/1983, do 22 de febreiro, de normas reguladoras da Xunta e da súa presidencia; no Decreto 42/2024, do 14 de abril, polo que se establece a estrutura orgánica da Xunta de Galicia; no Decreto 49/2024, do 22 de abril, polo que se fixa a estrutura orgánica das consellerías da Xunta de Galicia; no Decreto 139/2024, do 20 de maio, polo que se establece a estrutura orgánica da Consellería de Política Social e Igualdade, e polo establecido no Acordo do Consello da Xunta de Galicia, do 27 de marzo de 1991.

Doutra parte:

Dona Ana Pardo Fernández, presidenta da asociación Rede Europea de Loita contra a Pobreza e a Exclusión Social no Estado Español da Comunidade Autónoma de Galicia (en adiante EAPN Galicia), con NIF G70209549, en virtude do seu nomeamento segundo o acordo de modificación da Xunta Directiva adoptado pola Asemblea Xeral de dita asociación o día 3 de xullo do 2023, actuando en nome e representación daquela ao abeiro das funcións atribuídas conforme ao disposto no artigo 29 do seus estatutos asinados con data do 28 de febreiro de 2025.

Ambas as dúas partes, no nome e representación no que concorren e coa capacidade legal suficiente para este acto

MANIFESTAN

PRIMEIRO.- Que as administracións públicas poden celebrar convenios de colaboración con outras administracións ou entes de dereito público e con persoas físicas ou xurídicas ao abeiro do disposto no capítulo VI do título preliminar da Lei 40/2015, do 1 de outubro, do réxime xurídico do sector público.



SEGUNDO.- Que a Comunidade Autónoma de Galicia, segundo o establecido no artigo 27.23 do Estatuto de autonomía de Galicia, en consonancia coa habilitación competencial outorgada ás Comunidades Autónomas polo artigo 148.1.20 da Constitución española ten competencia exclusiva en materia de asistencia social, polo que na súa virtude se aprobou a Lei 13/2008, do 3 de decembro, de servizos sociais de Galicia.

TERCEIRO.- Que a Consellería de Política Social e Igualdade é o órgano superior da administración autonómica ao que lle corresponde as competencias en materia de servizos sociais, conforme ao Decreto 139/2024, do 20 de maio, polo que se establece a súa estrutura, e ten entre as súas funcións e competencias as relativas á inclusión activa e integración sociolaboral das persoas en situación ou risco de exclusión social.

CUARTO.- Que EAPN-Galicia é unha entidade de natureza asociativa que agrupa a entidades autonómicas do Terceiro Sector de Acción Social implicadas na loita e na defensa dos dereitos de persoas en situación ou risco de pobreza e exclusión, mediante a incidencia política e social.

Constituída o 15 de setembro de 2008 conforme ao artigo 5 da Lei Orgánica 1/2002, do 22 de marzo, reguladora do dereito de asociación está inscrita no Rexistro Central de Asociacións da Comunidade Autónoma de Galicia co número 2009/012813-1 e máis no Rexistro Único de Entidades Prestadoras de Servizos Sociais da Consellería de Política Social e Igualdade co número E-5769.

Segundo os seus estatutos, carece de ánimo de lucro, conta con personalidade xurídica propia, autónoma en relación ás das súas entidades asociadas e con plena capacidade para ser suxeito de dereitos e obrigas.

O seu ámbito de actuación é, principalmente, a Comunidade Autónoma de Galicia e ten como fins, entre outros, os seguintes:

- a) Facilitar os fluxos de información entre as organizacións do Terceiro Sector de Acción Social e contribuír á formación dos seus diversos axentes.
- b) Contribuír a analizar a realidade da pobreza e a exclusión social e reflexionar sobre as súas causas e sobre as propostas para a incidencia das mesmas, promovendo estudos e investigacións así como xornadas, seminarios e foros de reflexión e análise.
- c) Incidir nas políticas sociais desenvolvidas en Galicia, dende o ámbito europeo e estatal ata o local, principalmente nas políticas deseñadas e executadas pola Xunta de Galicia.
- d) Potenciar a transparencia e mellora da xestión do sector, desenvolvendo unha estratexia de calidade e responsabilidade das organizacións, así como recompilando e transferindo as boas prácticas identificadas.
- e) Facilitar a participación das persoas en risco de pobreza ou exclusión social nas entidades membro e diante das diversas administracións públicas.



- f) Sensibilizar ao conxunto da sociedade e corresponsabilizar aos axentes clave, en particular administracións públicas e empresas, sobre as cuestións relativas á inclusión social a través de diferentes iniciativas, como a responsabilidade social corporativa.

QUINTO.- Que para a consecución dos ditos fins EAPN-Galicia realiza actividades, especialmente en tres liñas de actuación:

- a) Sistema de información compartida e traballo colaborativo e en rede:

Esta actuación comprende as actividades relacionadas co sistema de información, a transformación dixital da entidade e o desenvolvemento do traballo en grupo para a realización de estudos e o compartimento da información e boas prácticas.

- b) Incremento da capacidade de investigación e propostas de mellora na loita contra a pobreza, exclusión social e servizos sociais:

Esta actuación comprende, basicamente, a realización de propostas e informes en distintas materias (servizos sociais, emprego, vivenda), a organización de foros sobre pobreza, exclusión social e Terceiro Sector de Acción Social e a elaboración dunha estratexia de colaboración, xestión do coñecemento e traballo conxunto entre servizos sociais, universidades e Terceiro sector Social galego.

- c) Aumento da capacidade de comunicación interna e externa para a difusión da mensaxe de defensa dos dereitos das persoas en situación ou risco de pobreza e exclusión.

Esta actuación realízase especialmente a través do mantemento dun grupo de comunicación operativo, a realización de seminarios e campañas de comunicación e o fomento da participación de persoas en risco de pobreza ou exclusión en encontros de participación.

SEXTO.- Que a Consellería de Política Social e Igualdade, no exercicio das competencias que lle atribúe o Decreto 139/2024, do 20 de maio, considera axeitado desenvolver unha liña de colaboración coa concesión dunha subvención pública a través da subscripción dun convenio con EAPN-Galicia, para facer posible o desenvolvemento das actuacións da dita entidade tendentes á coordinación, optimización dos recursos e sinerxias de actuacións das entidades que a integran, as cales teñen como finalidade a loita contra a pobreza e a exclusión social descritas no expoñendo cuarto.

A instrumentación desta axuda por medio dun convenio de colaboración singular reside na circunstancia de que os estatutos de EAPN-Galicia configúranos como a única entidade que ten por obxecto a incidencia no deseño de novas políticas e prácticas que contribúan á defensa dos intereses das persoas en situación de pobreza e/ou exclusión social provocando cambios que optimicen os procesos de inclusión social en Galicia. Así mesmo é a única na que se establece que poderán ser membros da mesma todas as persoas xurídicas sen ánimo de lucro involucradas na



loita contra a pobreza e/ou a exclusión social, definida de acordo co establecido no artigo 3.1 da Lei 10/2013, do 27 de novembro, de inclusión social de Galicia.

EAPN-Galicia apoia as entidades representantes das persoas vulnerables que conectan os seus esforzos para conseguir sinerxias e crear unha plataforma que canalice e dea voz ás demandas do sector. De acordo con isto, a Consellería de Política Social e Igualdade considera que a colaboración no mantemento das actuacións descritas nos fins de EAPN-Galicia cumpre, indubidablemente, unha función de interese social en consonancia co establecido no artigo 19.4.c) da Lei 9/2007, do 13 de xuño, de subvencións de Galicia e no artigo 40 do seu regulamento, aprobado polo Decreto 11/2009, do 8 de xaneiro.

Por todo o exposto as partes comparecentes, na representación que ostentan, acordan subscribir un convenio de colaboración coa suxeición ás seguintes

CLÁUSULAS

PRIMEIRA. *Obxecto e contido*

É obxecto do presente convenio a concesión dunha subvención de carácter directo por parte da Consellería de Política Social e Igualdade a EAPN-Galicia para a realización, por parte desta última, dunha serie de actuacións encamiñadas á coordinación, optimización dos recursos e sinerxias de actuacións das súas entidades membro, que teñen como finalidade a loita contra a pobreza e a exclusión social e que aseguren a unión de esforzos e o incremento da eficacia e eficiencia das actuacións destas entidades, que a seguir se relacionan:

- a) A creación de grupos de traballo, tanto estables como *ad hoc*, establecendo calendarios de realización das xuntanzas, con implicación de persoas expertas das entidades membro e alleas a estas. Inclúe a realización de actividades como:
 - Grupo de traballo de fomento da participación de persoas en pobreza ou exclusión social, que se concretará na preparación de obradoiros que teñen carácter preparatorio á celebración dun propio Encontro galego de participación social para a elaboración de propostas políticas, na formación e preparación da delegación que asista ao Seminario Estatal de Participación, a presentación de propostas á Valedora do Pobo no marco do Día Internacional de Erradicación da Pobreza que se celebra o 17 de outubro e a identificación de boas prácticas de participación social en entidades do Terceiro Sector de Acción Social.
 - Grupo de traballo sobre emprego e inserción socio laboral, concretado na elaboración e difusión de propostas que aseguren o enfoque integral, persoal, social e laboral tal e como se teñen explicitado no Manual de boas prácticas para a inclusión sociolaboral con persoas vulnerabilizadas, tanto para as convocatorias de subvencións da





consellería competente en materia de política social como, especialmente, da consellería competente en materia de emprego (Posta a punto para o emprego, Programas integrados para o emprego de persoas en vulnerabilidade ou Cooperación), asegurando a coordinación entre ambas as consellerías neste eido, en especial no marco do previsto na nova Lei de Inclusión e a concorrencia competitiva, e a non discriminación no acceso de entidades sen ánimo de lucro ás diferentes convocatorias.

- Fórum de asesoras e asesores xurídicos do Terceiro Sector de Acción Social galego. Dinamización e formación, con especial fincapé nos eidos de estranxeiría e discapacidade.
 - Grupo de traballo sobre a nova Lei de Inclusión Social de Galicia, favorecendo sinerxías entre a Renda de Inclusión Social de Galicia e o Ingreso Mínimo Vital, e medidas de emerxencia como a Tarxeta moedeiro, unha vez se transfiran á Xunta de Galicia.
 - Grupo de traballo sobre inserción socio-residencial e acceso á vivenda, facilitando a presentación de propostas de mellora das políticas e compromisos neste eido, como o aumento do parque público de vivendas para alugueiro social, o Bono de alugueiro social e o Bono entidades, así como a coordinación política e técnica entre as Consellerías competentes en materia de vivenda e de política social.
 - Grupos *ad hoc* para traballar na definición e presentación de propostas consensuadas e suxestións de mellora, en relación coas seguintes materias: convocatorias de subvencións do exercicio 2025 en materia de exclusión social e IRPF (programas de interese xeral para fins de carácter social, con cargo á asignación tributaria do 0,7% do IRPF e do Imposto de Sociedades) que leve a cabo a Xunta de Galicia, contemplando a difusión das mesmas nas entidades potencialmente beneficiarias; nova Lei de diálogo civil de Galicia; retos e boas prácticas no coidado e prevención de riscos psicosociais nas entidades do Terceiro Sector; Plan de apoio ás familias monoparentais; principios e compromisos para a aplicación da perspectiva de xénero en entidades do Terceiro Sector ou contra o discurso do odio e a aporofobia; desinstitucionalización e novo modelo de coidados das persoas vulnerabilizadas.
- b) A garantía dunha presenza e interlocución activa na definición de propostas que melloren as políticas públicas que afectan á redución da pobreza e a exclusión social, como: a redacción normativa, convocatorias de subvencións, informes de seguimento e propostas electorais. No 2025 inclúe a realización de actividades como:
- Participación no Consello Galego de Benestar Social; seguimento da Estratexia de Inclusión Social de Galicia 2023-2030 ou propostas para a modificación do Regulamento da Lei de dependencia.





- Elaboración dun documento co seguimento dos compromisos da Axenda Social de Galicia: seguimento de compromisos, en especial o de creación de 100 vivendas de transición e erradicación do chabolismo e infravivenda no 2030.
- Dinamización de xuntanzas periódicas de coordinación coa Consellería de Política Social e Igualdade : convocatorias, IRPF, inclusión social, Lei de inclusión social de Galicia ou Rexistro de Entidades Prestadoras de Servizos Sociais.
- Elaboración do documento de seguimento de compromisos electorais e propostas de EAPN-Galicia, acordadas coas súas entidades membro, para a lexislatura 2024-2027, para servir de base á interlocución cos grupos parlamentarios e a presidencia da Xunta de Galicia.
- Elaboración do informe da vivenda en Galicia 2025. Análise da implantación en Galicia das políticas públicas de vivenda, estatal e autonómica. Participación activa nas seccións Social e de Intermediación e financiamento do Observatorio Galego da Vivenda, recollendo e trasladando as propostas acordadas coas entidades membro especializadas.
- Elaboración de propostas de mellora da inserción socio-residencial de persoas vulnerables tanto para o Bono de alugueiro social como para o novo programa do Bono de alugueiro para entidades de iniciativa social prestadoras de servizos sociais.
- Elaboración do informe sobre boas prácticas de acceso á vivenda nos concellos galegos.
- Consulta e informe sobre vivendas xestionadas dende as entidades do Terceiro Sector Social galego.
- Elaboración de propostas contra a pobreza enerxética nas estratexias estatal e galega.
- Elaboración do informe do Estado da Pobreza 2025 e presentación ante a Valedora do Pobo, os grupos parlamentarios e os medios de comunicación.
- Participación nos Comités de Seguimento de Fondos Estructurais FSE+ e FEDER 2021-2027, así como na aplicación dos Fondos *Next Generation* (Mecanismo de Reconstrución e Resiliencia).
- Elaboración de propostas para introducir na modificación da vixente Lei de inclusión social de Galicia e das que teñen por obxecto unha futura integración dos procedementos de xestión do Ingreso Mínimo Vital, Renda de inclusión social de Galicia (RISGA) e Tarxeta básica.
- Realización do seminario *web: Construindo un plan de apoio ás familias monoparentais*, asegurando que se cumpre o previsto no artigo 40 da Lei 5/2021, de 2 de febreiro, de impulso demográfico de Galicia.





- Difusión do plan RENOVE de electrodomésticos 2025, proporcionando información sobre as oportunidades deste plan para persoas vulnerables.
 - Realización do seminario *web: Os centros de crise 24 horas para vítimas de violencia sexual*.
 - Actuacións no 2025 para o recoñecemento do Terceiro Sector de Acción Social (TSAS): Seminario Terceiro sector social en Galicia: Así Somos; Seminario Cara unha Lei dialogo civil de Galicia, fomento do traballo en rede co Comité de Entidades Representantes de Persoas con Discapacidade de Galicia (CERMI Galicia) e a Plataforma da Infancia de Galicia.
 - Apoio á economía social e solidaria e reforzo do Terceiro Sector como familia da mesma. Colaboración e difusión do traballo conxunto coa Unión de Cooperativas *EspazoCoop*, Foro de Economía Social de Galicia (Foro *EsGal*) e Fiare Banca Ética. Participación no Consello de Economía Social.
 - Actuacións de análise dos efectos ocasionados pola aplicación da normativa xurídica, con incidencia nos servizos sociais e nas políticas de acceso ao emprego e á vivenda.
- c) O incremento da participación democrática e a incidencia social e política dos galegos e galegas en risco de pobreza e exclusión social. Inclúe a realización de actividades destinadas ao dito colectivo como:
- Creación e apoio á delegación galega de persoas en pobreza ou exclusión para asistir ao Encontro de Participación Estatal e deseño do XVI Encontro Galego de Participación, incluíndo seminarios locais previos.
 - Identificación de boas prácticas de participación social en entidades do Terceiro Sector galego.
 - Participación específica de persoas en risco de pobreza ou exclusión social, tanto na problemática das dificultades de acceso aos servizos públicos como na garantía de dereitos e novos modelos de servizos sociais .
 - Celebración do Día da Erradicación da Pobreza: acto sobre o mesmo coa Valedora do Pobo e grupos parlamentarios.
 - Estudo e recompilación de boas prácticas para o auto coidado e prevención de riscos psicosociais nas entidades do Terceiro Sector de Acción Social, no seu traballo con persoas en risco e/ou situación de pobreza e/ou exclusión social.
- d) Facilitar a comunicación interna e externa e o recoñecemento das organizacións de iniciativa social do Terceiro Sector Social galego e o fomento do diálogo civil coas administracións públicas galegas. Inclúe a realización de actividades como:
- Campaña de fomento do *X Solidario*, tanto na campaña do IRPF (*#EmerXenciaSolidaria*) como no Imposto de Sociedades (*#EmpresasconImpacto*) do exercicio 2025.





- Exposición itinerante e ponencias en universidade e sindicatos no marco da campaña *#EmerxenciaVivenda*.
 - Campaña de comunicación *#12meses12demandas*.
 - Deseño da campaña de comunicación *#OrgulloTerceiroSector*.
 - Campaña de comunicación *#Nonpoñasoidoaoodio* contra o discurso de odio e a aporofobia.
 - Boletín *EnRedeSocial*, 20 edicións. Renovación estética e de contidos para acadar as 2000 persoas subscritoras.
 - Boletín semanal interno, 40 edicións. Novidades, entre outras, do Consello da Xunta, novas sobre política social ou MATIASS (Manual de Traballo, Información e Asesoramento de Servizos Sociais).
- e) Fomentar iniciativas conxuntas nas que participen organizacións de iniciativa social e administracións públicas para a formación e difusión de ferramentas sobre: construción do discurso, tolerancia e loita contra a aporofobia, discurso do odio e desinformación cara a calquera colectivo en risco de vulnerabilidade, así como de apoio ás súas vítimas. Inclúe a realización de actividades como:
- Participación en eventos de loita contra a pobreza, o discurso do odio e a aporofobia. Entre as entidades previstas están, ademais de EAPN, a Escola Universitaria de Traballo Social ou a Facultade de Psicoloxía e Ciencias Políticas da Universidade de Santiago de Compostela, a Escola de Relacións Laborais da Universidade da Coruña, a Facultade de Educación e Traballo Social da Universidade de Vigo, e os Ciclos de Integración Social.
 - Elaboración de declaración contra o discurso do odio e a aporofobia no marco da campaña de comunicación *#Nonpoñasoidoaoodio*.
 - Análise de prexuízos e condutas aporófobas coas familias monoparentais no marco do seminario para elaborar proposta de plan de apoio.
 - Seminario: Os discursos de odio e aporofobia no acceso aos servizos públicos (18 xuño, Día contra o discurso do odio).
- f) Facilitar o coñecemento mutuo, a colaboración e a interrelación entre o Terceiro Sector de Acción Social (TSAS) e as universidades en diversos ámbitos, como son a formación, a investigación aplicada, o voluntariado ou a aprendizaxe combinada con servizo. Inclúe a realización de actividades como:
- Impulso de foro específico de diálogo e do grupo de discusión conxunto de expertas e expertos das diferentes universidades galegas e do Terceiro Sector de Acción Social.
 - Consulta de necesidades e demandas de investigación universitaria dende as entidades do Terceiro Sector.





- Estratexia de colaboración, identificación de alianzas, xestión do coñecemento e traballo conxunto entre servizos sociais, universidades e entidades do Terceiro Sector principalmente nos eidos de servizos sociais, emprego ou vivenda.
- Mapa de boas prácticas e iniciativas de colaboración entre universidades e Terceiro Sector.
- Implicación de persoas expertas da universidade no fomento do coidado e prevención de riscos psicosociais nas entidades do Terceiro Sector.

SEGUNDA. Obrigas da entidade como beneficiaria da subvención

EAPN-Galicia asume as obrigas sinaladas no artigo 11 da Lei 9/2007, do 13 de xuño, de subvencións de Galicia, en especial, acepta os seguintes compromisos como consecuencia da sinatura deste convenio:

- a) Acreditar a realización das actuacións a subvencionar así como a aplicación dos fondos ao fin destinado de acordo co establecido na cláusula quinta deste convenio.
- b) Cumprir os requisitos e non atoparse en ningunha das circunstancias e prohibicións establecidas no artigo 10 da Lei 9/2007, do 13 de xuño.
- c) Acreditar documentalmente antes da sinatura do convenio e do pagamento, no caso de oporse expresamente á consulta pola Administración, o cumprimento das obrigas tributarias e fronte á Seguridade Social e o non ter pendentes débedas coa Comunidade Autónoma nin ser debedora por resolución de procedencia de reintegro, ao abeiro do artigo 28 da Lei 39/2015, do 1 de outubro, do procedemento administrativo común das administracións públicas.
- d) Comunicar a obtención doutras subvencións, axudas, ingresos ou recursos que financien as accións derivadas da concesión da subvención obxecto do convenio. Esta comunicación deberá efectuarse tan pronto como se coñeza e en todo caso con anterioridade á xustificación da aplicación dada aos fondos percibidos.
- e) Facilitar as actuacións de comprobación e subministrar a información, incluíndo o resultado da auditoría económica realizada pola entidade, requirida pola Consellería de Política Social e Igualdade, a través dos seus órganos competentes en materia de inclusión social e de inspección de servizos sociais, así como pola Intervención Xeral da Comunidade Autónoma, o Consello de Contas e o Tribunal de Contas, no exercicio das súas funcións de fiscalización e control. Para os efectos de comprobación administrativa, a sede de EAPN-Galicia está situada en Santiago de Compostela, na rúa República do Salvador, 3, 2º D, e o seu enderezo electrónico para as relacións coa Administración pública é: *info@eapn-galicia.com*.
- f) Informar á Consellería de Política Social e Igualdade, a través do órgano directivo competente en materia de inclusión social, do funcionamento das actuacións a subvencionar a través deste convenio.





- g) Adecuar a forma de presentación dos datos relativos á execución das accións, así como os instrumentos xustificativos do gasto, á Lei 9/2007, do 13 de xuño, e á Lei 39/2015, do 1 de outubro.
- h) Adoptar as medidas de difusión contidas no artigo 15.3 da Lei 9/2007, do 13 de xuño, e no 20 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia. Estas medidas consistirán na inclusión da imaxe institucional da Xunta de Galicia así como nunha lenda alusiva ao financiamento público das actuacións subvencionadas en carteis, placas, materiais impresos e medios electrónicos e audiovisuais, entre outros, que teñan relación coas accións e actuacións a subvencionar.
- i) Levar un arquivo e custodia durante, polo menos, cinco anos, da documentación substantiva e financeira que soporte e acredite a realización das accións a subvencionar a través deste convenio. En particular, EAPN-Galicia comprométese a achegar inescusablemente nun prazo de dez días cantas facturas, nóminas e demais documentos de carácter contable lle sexan requiridos pola Consellería de Política Social e Igualdade.
- j) Reintegrar os fondos percibidos nos supostos contemplados nos artigos 32 e 33 da Lei 9/2007, do 13 de xuño.
- k) Cumprir cantas outras obrigas se deriven da execución do disposto neste convenio.

TERCEIRA. Orzamento

A concesión da subvención regulada neste convenio terá como límite global o crédito asignado para estes fins na Lei 4/2024, do 27 de decembro, de orzamentos xerais da Comunidade Autónoma de Galicia para o ano 2025, na aplicación 08.03.312A.481.3, e destinarase á financiación das actuacións indicadas anteriormente por un importe global de CENTO CINCO MIL EUROS (105.000,00 €), sen prexuízo de ulteriores variacións producidas como consecuencia das modificacións orzamentarias.

CUARTA. Gastos subvencionables

A condición de gasto imputable deriva do cumprimento dos seguintes requisitos: que sexa un gasto directo que de xeito indubidable responda á natureza das actuacións a subvencionar a través deste convenio; que sexa axeitado aos obxectivos da medida á que pertence; que exista constancia documental sobre a súa realización de xeito verificable e que se realice dentro do período establecido; que se acredite mediante facturas ou documentos de valor probatorio equivalente con validez no tráfico xurídico mercantil ou con eficacia administrativa, e que sexa efectivamente pagado pola entidade beneficiaria dentro do prazo de xustificación.

Poderán financiarse con cargo a este convenio gastos correntes e consumibles non amortizables necesarios para a realización das actuacións, tales como:

- a) Gastos de persoal.



- b) Aluguer (incluídos gastos de comunidade).
- c) Combustible e outros gastos de desprazamento.
- d) Seguros: vehículos, locais, e para o persoal voluntario.
- e) Material de oficina non inventariable.
- f) Mantemento e material de reposto de máquinas, instalacións e equipos.
- g) Teléfono e enerxía eléctrica.
- h) Gastos de publicidade, sensibilización, consultoría, formación e asesoría externa.
- i) Gastos de auditoría necesarios para a xustificación das actuacións a subvencionar a través do convenio.

Estes gastos serán subvencionados coa condición de que correspondan a custos reais de execución das actuacións financiadas a través da concesión directa da subvención obxecto do convenio e se asignen de forma rateada á operación, de acordo cun método equitativo debidamente xustificado pola entidade beneficiaria.

Non se poderán financiar os gastos que supoñan calquera tipo de investimento en bens inventariables.

QUINTA. Forma de xustificación e pagamento

Respecto da forma de xustificación e pagamento estarase ao disposto na, Lei 4/2024 do 27 de decembro de orzamentos xerais da Comunidade Autónoma de Galicia para o ano 2025, na Lei 38/2003, do 17 de novembro, xeral de subvencións; no Real decreto 887/2006, do 21 de xullo, polo que se aproba o regulamento da Lei 38/2003, do 17 de novembro, xeral de subvencións; na Lei 9/2007, do 13 de xuño e no Decreto 11/2009, do 8 de xaneiro.

O pagamento efectuarase previa presentación da conta xustificativa de gasto que permita acreditar o cumprimento das actuacións a subvencionar a través deste convenio, cuxo contido se detalla na cláusula sexta.

A entidade beneficiaria poderá solicitar pagamentos parciais a conta da liquidación definitiva, ata o 80% da contía total concedida, a medida en que EAPN-Galicia xustifique os gastos realizados e o cumprimento da finalidade para a que foi concedida a axuda, así como a aplicación dos fondos destinados para estes efectos. Estes libramentos parciais quedarán exonerados da constitución de garantías previstas no artigo 67 do Decreto 11/2009, do 8 de xaneiro, por estar incluídos no suposto recollido no apartado f) do artigo 65.4.

O 20% restante farase efectivo unha vez rematada e xustificada a realización da totalidade da actividade subvencionada.





A data límite de xustificación, para os efectos do artigo 37.2.e) do Decreto 11/2009, do 8 de xaneiro, é o 16 de decembro de 2025, agás que se trate de gastos correspondentes a impostos ou cotas por seguros sociais relativos a gastos directos de accións realizadas ata o 16 de decembro de 2025 liquidables con posterioridade a esta data; neste caso, o prazo de xustificación poderá comprender ata o derradeiro día do mes seguinte ao último trimestre do exercicio en que se estableza a axuda.

En aplicación do artigo 29.2 da Lei 9/2007, do 13 de xuño, e do artigo 42 do Decreto 11/2009, do 8 de xaneiro, considérase gasto realizado o que foi efectivamente pagado con anterioridade á data de finalización do período de xustificación.

SEXTA. Documentación para xustificar as axudas

1. Para xustificar o pagamento final a entidade beneficiaria da subvención presentará unha conta xustificativa que incorpore:

- a) Unha memoria de resultados das actuacións subvencionadas.
- b) Certificacións que acrediten o cumprimento das obrigas tributarias co Estado e coa Comunidade autónoma de Galicia, e das obrigas coa Seguridade Social.
- c) Unha memoria económica abreviada que constará da seguinte documentación:

1º. Unha relación clasificada dos gastos do persoal adscrito á execución das actuacións subvencionadas, na que se indique: identificación da persoa traballadora, categoría laboral, mes, nómina neta, IRPF, cotas da Seguridade Social da persoa traballadora e da entidade empregadora, nómina bruta e a porcentaxe desta que se imputa á subvención.

2º. Unha relación clasificada dos restantes gastos correntes das actuacións subvencionadas, na que se identifiquen: persoa acreedora, número de factura ou documento equivalente, importe imputado, data de emisión e data de pagamento.

- d) Un informe dunha persoa auditora sometida á Lei 22/2015, do 20 de xullo, de auditoría de contas e inscrita no Rexistro Oficial de Auditores de Contas dependente do Instituto de Contabilidade e Auditoría de Contas, conforme ao artigo 50 do Decreto 11/2009, do 8 de xaneiro. Acompañará a conta xustificativa de gasto unha certificación emitida por ese rexistro para a comprobación da inscrición.

No caso de que EAPN-Galicia estivera obrigada a auditar as súas contas anuais por un persoa auditora, a revisión da conta xustificativa poderá ser efectuada pola persoa auditora contratada para ese labor ou por outra distinta, de conformidade co artigo 50.2 do Decreto 11/2009, do 8 de xaneiro.





O informe de auditoría que achegue a entidade axustarase ao disposto na Orde EHA/1434/2007, do 17 de maio, pola que se aproba a norma de actuación dos auditores de contas na realización dos traballos de revisión de contas xustificativas de subvención, no ámbito do sector público estatal, previstos no artigo 74 do Real decreto 887/2006, do 21 de xullo, e polo disposto neste convenio.

A verificación que figure no informe de auditoría terá, en todo caso, o seguinte alcance:

- 1º. O cumprimento por parte de EAPN-Galicia das obrigas establecidas neste convenio e no resto da normativa que rexe a xestión e a aplicación da subvención.
- 2º. A adecuada e correcta xustificación da subvención por parte da entidade beneficiaria.
- 3º. A realidade e a regularidade das actuacións que foron financiadas coa subvención.
- 4º. O adecuado e correcto financiamento das actuacións subvencionadas.

O informe de auditoría permitirá obter evidencia suficiente para poder emitir unha opinión sobre a execución dos gastos das actuacións subvencionadas. En todo caso, deberá comprobarse:

- 1.º Que a conta xustificativa foi subscripta polo representante legal da entidade beneficiaria ou persoa que asuma a dita competencia, debendo anexar ao informe unha copia dela selada pola persoa auditora.
- 2.º Que existe concordancia entre a memoria de actuación e os documentos xustificativos do gasto realizado. Se existiran desviacións respecto do orzamento desagregado de gastos previstos achegado pola entidade beneficiaria ao inicio da tramitación do convenio deberase engadir a explicación de cada unha delas.
- 3.º Que o importe xustificado corresponde ao concedido, e que se atopa correctamente desagregado e identificado na conta xustificativa con indicación das imputacións aplicadas. A revisión abarcará a totalidade dos gastos incorridos na realización das actuacións subvencionadas.
- 4.º Se existiren outros ingresos ou subvencións que concorran ao financiamento das actuacións subvencionadas, deberase indicar o seu importe e a súa procedencia. Ademais, farase mención expresa ao custo total repercutido das mesmas para a entidade, e certificarase que non existe sobrefinanciamento da actuación subvencionada de conformidade coa cláusula sétima.
- 5.º Que o gasto declarado é real e elixible e que está debidamente acreditado e xustificado conforme a normativa vixente. Para iso, no informe deberá confirmarse:
 - 5º.1. Que os gastos realizados e imputados ás actuacións obxecto de subvención gardan unha relación directa con elas e son conformes coas normativas





autonómica, nacional e comunitaria en materia de elixibilidade de gastos e subvencións.

5.º.2. Que as facturas orixinais ou documentos contables de valor probatorio equivalente que figuran na relación de gastos contan cos datos requiridos pola lexislación vixente e que os devanditos gastos foron realizados e efectivamente pagados con anterioridade á finalización do período de xustificación, salvo aqueles que pola súa propia natureza deban liquidarse en datas posteriores.

- 6.º Que EAPN-Galicia utiliza un sistema de contabilidade separada ou codificación contable que permite a inequívoca identificación dos gastos realizados.
- 7.º Que EAPN-Galicia dispón de ofertas de diferentes provedores, nos supostos previstos no artigo 29.3 da Lei 9/2007, do 13 de xuño, e dunha memoria que xustifique razoablemente a elección da entidade provedora, naqueles casos en que non recaera na proposta económica máis vantaxosa.
- 8.º Que a persoa que exerza a auditoría se pronunciará sobre a elixibilidade do Imposto do Valor Engadido imputado ao programa e que non é susceptible de recuperación ou compensación.
- 9.º Que existe acreditación documental, material e/ou gráfica, coma fotografías, fotocopias ou captura de pantallas, do cumprimento da obriga de información e publicidade do financiamento público das actuacións subvencionadas.

2. Para xustificar os libramentos parciais, a entidade beneficiaria presentará unha conta xustificativa que incorpore a mesma documentación que a conta xustificativa do pagamento final, coa excepción da memoria de resultados das actuacións subvencionadas e da parte do informe de auditoría que fai referencia a outros ingresos ou subvencións que concorran ao financiamento das ditas actuacións.

SÉTIMA. Obtención doutras axudas

1. Toda alteración das condicións tidas en conta para a celebración deste convenio e, en todo caso, a obtención concorrente de subvencións ou axudas outorgadas por outras administracións ou entes públicos ou privados, nacionais ou internacionais, poderá dar lugar á modificación das condicións establecidas nas súas cláusulas.
2. O importe da subvención non poderá, en ningún caso, ser de tal contía que, illadamente ou en concorrencia con outras subvencións ou axudas, ingresos ou recursos doutras administracións públicas supere o custo das actuacións subvencionadas a través do convenio. Como regra xeral, permítese a acumulación de axudas, sempre que o importe total destas non supere o custe total a subvencionar a través deste convenio.



OITAVA. Comisión de seguimento

Para o seguimento e coordinación das accións previstas no presente convenio crearase unha comisión mixta e paritaria na que estarán representados as partes asinantes deste. Esta comisión, que se reunirá por petición de calquera das partes, será o mecanismo de actuación conxunta para o seguimento e avaliación das actuacións estipuladas no presente convenio, e estará formada por dous representantes da Consellería de Política Social e Igualdade e dous representantes de EAPN Galicia, así como os seus suplentes, designados polas persoas que representen a cada unha das partes.

A persoa que ocupe a presidencia será unha das persoas representantes da Administración, designada pola persoa titular do órgano de dirección competente en materia de Inclusión Social.

A persoa que ocupe a secretaría, que actuará con voz pero sen voto, así como a súa suplencia, será unha persoa adscrita ao órgano de dirección competente en materia de inclusión social, designada pola persoa que asuma a presidencia.

Como órgano colexiado a comisión someterase ao réxime establecido na Lei 40/2015, do 1 de outubro, do réxime xurídico do sector público e na Lei 16/2010, do 17 de decembro, de organización e funcionamento da Administración xeral e do sector público autonómico de Galicia.

NOVENA. Inexistencia de relación laboral

A subscripción do presente convenio non implicará relación laboral ningunha entre a Consellería de Política Social e Igualdade e as persoas que desenvolvan as actuacións que formen parte do programa a subvencionar, de xeito que por este concepto non se lle poderá esixir ningunha responsabilidade, nin directa nin subsidiaria, polo acontecido no desenvolvemento deste.

DÉCIMA. Duración

A vixencia do presente convenio estenderase desde a data da súa sinatura ata o día 31 de decembro do ano 2025.

Non obstante, financiaranse os gastos realizados que cumpran as condicións indicadas na cláusula cuarta, derivados das actuacións a subvencionar levadas a cabo dende o 1 de xaneiro do actual exercicio ata o 16 de decembro de 2025.

DÉCIMO PRIMEIRA. Causas de resolución e reintegro

1. Serán causas de resolución do convenio e darán lugar, no seu caso, ao reintegro das cantidades percibidas, incrementadas cos xuros legais establecidos, de acordo coa normativa vixente:





- a) O transcurso do prazo de vixencia do convenio.
- b) O acordo unánime das partes asinantes.
- c) O incumprimento total ou parcial do obxectivo ou das actividades ~~ou do programa~~ que fundamentan a concesión da subvención.
- d) A aplicación dos fondos outorgados no convenio para fins distintos do que motivaron a súa concesión.
- e) A falta de xustificación do emprego das cantidades recibidas, ou a falsidade de datos achegados para esta fin.
- f) Por decisión xudicial firme que declare a nulidade do convenio.
- g) Por calquera outra causa distinta das anteriores prevista na lexislación vixente.

2. Aos efectos de reintegro das subvencións estarase ao disposto no título II da Lei 9/2007, do 13 de xuño, e no Decreto 11/2009, do 8 de xaneiro.

DÉCIMO SEGUNDA. *Carácter administrativo do convenio*

Este convenio terá carácter administrativo, rexéndose os seus efectos polo establecido nas súas cláusulas e no non previsto por estas aplicaráselle os principios contemplados na Lei 9/2017, do 8 de novembro, de contratos do sector público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, para resolver as lagoas e dúbidas que puidesen presentarse. Así mesmo, rexeráse tamén pola Lei 40/2015, do 1 de outubro, pola Lei 38/2003, do 17 de novembro, pola Lei 9/2007, do 13 de xuño, e polo Decreto 11/2009, do 8 de xaneiro.

A Administración gozará de todas as prerrogativas inherentes á natureza administrativa do convenio.

DÉCIMO TERCEIRA. *Cuestións litixiosas*

1. As cuestións litixiosas xurdidas acerca da interpretación, modificación ou efectos do convenio serán resoltas pola Consellería de Política Social e Igualdade poñendo os seus acordos fin á vía administrativa.
2. Contra estes acordos cabe interpoñer recurso potestativo de reposición no prazo dun mes ante o mesmo órgano que ditou a resolución, segundo o previsto na Lei 39/2015, do 1 de outubro, se a resolución fose expresa ou, se o acto non o fose, en calquera momento a partir do día seguinte a aquel en que se produza o acto presunto.

Directamente poderá interpoñerse recurso contencioso administrativo, ante a Sala do contencioso administrativo do Tribunal Superior de Xustiza de Galicia, no prazo de dous



meses, contados desde o día seguinte á notificación do acto que poña fin á vía administrativa, se fose expreso. Se non o fose, o prazo será de seis meses e contarase, para a entidade interesada, a partir do día seguinte a aquel en que, de acordo coa súa normativa específica, se produza o acto presunto, de conformidade co disposto na Lei 29/1998, do 13 de xullo, reguladora da xurisdición contencioso-administrativa.

DÉCIMO CUARTA. *Transparencia e publicidade*

Este convenio será obxecto de publicidade e inscrición de conformidade co disposto no artigo 15 da Lei 1/2016, do 18 de xaneiro, de transparencia e bo goberno e no Decreto 126/2006, do 20 de xullo, polo que se regula o rexistro de convenios da Xunta de Galicia.

Así mesmo, a concesión da subvención será obxecto de publicación e inscrición en cumprimento do disposto no artigo 17 da lei 1/2016, do 18 de xaneiro, o artigo 15 da Lei 9/2007, do 13 de xuño, e no Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006.

As partes asinantes autorizan a publicidade dos seus datos persoais e demais especificacións recollidas no presente convenio de colaboración no Portal da Transparencia e Goberno Aberto.

De conformidade coa Lei 38/2003, do 17 de novembro, o convenio de colaboración e a información sobre a subvención serán comunicados á Base de Datos Nacional de Subvencións.

Como beneficiaria de subvención pública ao abeiro deste convenio, EAPN-Galicia obrígase a subministrar á Administración, previo requirimento, toda a información necesaria para que esta última poida cumprir coas obrigas previstas no Título I da Lei 1/2016, do 18 de xaneiro, coas consecuencias, no caso de incumprimento, indicadas no artigo 4 da devandita lei.

DÉCIMO QUINTA. *Información básica sobre protección de datos persoais*

As partes asinantes deste convenio garantirán a confidencialidade dos datos persoais aos que teñan acceso como consecuencia das actuacións realizadas en execución deste e de conformidade co disposto na Lei orgánica 3/2018, do 5 de decembro, de protección de datos persoais e garantía dos dereitos dixitais e no Regulamento (UE) 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento de datos persoais e a libre circulación de estes datos e polo que se derroga a Directiva 95/46/CE (Regulamento xeral de protección de datos).

Os datos persoais recadados neste procedemento serán tratados na súa condición de responsable pola Xunta de Galicia-Consellería de Política Social e Igualdade coa finalidade de levar a cabo a tramitación administrativa derivada da xestión da concesión directa a través deste



convenio que comprende verificar os datos e documentos que a entidade interesada achegue para comprobar a exactitude destes, levar a cabo as actuacións administrativas que se deriven e informar sobre o estado de tramitación.

O tratamento dos datos baséase no cumprimento dunha misión de interese público ou no exercicio de poderes públicos, conforme ás referencias recollidas no enlace <https://www.xunta.gal/información-xeral-proteccion-datos>, derivada dunha competencia legalmente atribuída ao responsable do tratamento, así como o cumprimento das obrigas legais impostas ao dito responsable de conformidade co disposto no artigo 6.1, letras c) e e) do Regulamento (UE) 2016/679 do Parlamento Europeo e do Consello, do 27 de abril de 2016 e o artigo 8 da Lei orgánica 3/2018, do 5 de decembro, e en concreto a competencia e obrigas previstas nos preceptos básicos da Lei 38/2003, do 17 de novembro, da Lei 9/2007, do 13 de xuño, na Lei 39/2015, do 1 de outubro, na Lei 1/2016, do 18 de xaneiro e na Lei 4/2019, do 17 de xullo, de administración dixital de Galicia. Con todo, determinados tratamentos poderán fundamentarse no consentimento das persoas interesadas, reflectíndose esta circunstancia de conformidade coa normativa de aplicación.

A referencia á publicidade, en cumprimento da normativa de transparencia e subvencións, axustarase a dita normativa e coas limitación que esta establece.

Como destinatarios, os datos serán comunicados ás administracións públicas no exercicio das súas competencias, cando sexa necesario para a tramitación e resolución dos seus procedementos ou para que os cidadáns poidan acceder de forma integral á información relativa a unha materia.

As persoas interesadas poderán solicitar o acceso, rectificación, oposición, limitación, portabilidade e supresión dos seus datos ou retirar, no seu caso, o consentimento outorgado a través da sede electrónica da Xunta de Galicia, ou nos lugares e rexistros establecidos na normativa reguladora do procedemento administrativo común, segundo se recolle en <https://www.xunta.gal/exercicio-de-dereitos>. O contacto coa persoa delegada de protección de datos e máis información consultarase no enlace <https://www.xunta.gal/proteccion-datos-persoais>.

E en proba de conformidade cos termos do convenio, as partes asínano no lugar e data da sinatura dixital.

A conselleira de Política Social e Igualdade
Fabiola García Martínez

A presidenta de EAPN-Galicia
Ana Pardo Fernández

